

1 PITA

Pita Gigirum Meuma Desiroma

1 ¹Pita me Iesu Keriso apasoro meuma gumbe aipe, at Pontas, Garatia, Kapadosia, Esia ge Bitinia apa wakeyawa wat gomiyamunnewa igiyawa munan. ²^aSira Mamunwa God watawit yang anone gumbe iyayapan mu wat gomiyamunne, Guwawa Iyakaisiyapama mui yutuwa aukape Iesu Keriso amave amtan oya, sira me diyawa meuma aigiviwa autan oya. Meoya ne anoeniwa ano oraiwa sira yum guniyap wakegimpe koka ape.

God Gumbe Waiya Atanwa

³God me Ayapan Iesu Keriso Mamawa mu waiya aigimpe. God ano kokawa nunivi, Iesu Keriso boag boriruwawaya igiyawa gumbo inaig yoinewa gumbe me ane nu sira yaitune ge owanowan gaibu vinigimta. ⁴^bSira nu oma ane matai kwanawa auta. Me den kukaipe sira den miyot umpe sira den inanatpe. Kwan mame yenan kwimin danave amaraivi. ⁵^cYe anotumat yeuma gumbe God yusiwa ye amara yenivi. Waita me kum oieba apa uwatan oya tamibarip anewa ye matai auya. ⁶^dMeoya ye degadega kokavit ene. Megara gare mame kum koni kusida apa ye dawai gina ube ube anog dawai auene. ⁷^eAnotumat oya dawai auenewa me garawa kokavit, gooru me iyam gumbe oraimina ane megara kukaipewa me garawa kusi. Sira Iesu Keriso uwapewa kumiwa apa, ye yang anoya dawai mame aig waiya ge ayamat ge eyawa uwape. ⁸^fYe Iesu Keriso den yauyana, megara imuiwa me gumbe avivi. Gare ye me den yavene, megara anotumat ene. Sira Ye degadega kokavit ene. Ye oma den ane gae gumbe waya degadega mame oya. Kuyawa degadega mame danave eyawa noidauwane. ⁹Kuyawa ye anotumat yeuma gumbe guwewa oya waita auyana.

^a 1:2 Rom 8:29; 2Te 2:13 ^b 1:4 1Ko 1:12 ^c 1:5 Jon 10:28; 17:11 ^d 1:6 Jms 1:2; 1Pi 5:10
^e 1:7 Pro 17:3; Jak 13:9; Mak 3:3; Jms 1:3 ^f 1:8 Jon 20:29; 2Ko 5:7

¹⁰ Propeta mu watawit ano oraiwa me matai yempewa oya waya. Mu gaibu waita mame oya yaimoyai anoya sira yaug anoya. ¹¹ Keriso Guwawa meuma me daneyap wakenewa me wait dirumwane Keriso edawai meuma ge eyawa me matai uwatan aiviwa oya. Sira mu yaug anoya bira aniyau uwatan aiviwa oya. ¹² God toewan munnewa nau mumawa me munanwa oya onan megara nunan oya. Guwawa Iyakaisiyapama me God baraune kwimin apa aig onnewa gumbe iyayapan upeba gae oraiwa waya. Mu gare mame me oya ye diruyeg waya. Aneya mina mu yautanwa oya di anogugut eme.

Iyakaisi Atanwa

¹³ Meoya ye yenanwa tamibarip aya, yembovit amaraya. Iesu Keriso uwapewa ano oraiwa auya, meoya ye yaimoyai amaraigimiya. ¹⁴ Ano atanwa usitainawa aya, watawit ye divi da den yaug anoyana. Me kumiwa apa ano kukaeba daneyap wakenewa me gumbe den aisiya. ¹⁵ Megara Iyakaisiyapama me yenan wanewa me iyakaisi, meoya ye mina dividivi undag enewa gumbe iyakaisi aya. ¹⁶ Kuyiwaya Baiboru wanewa, “Ye iyakaisi aya, kuyiwaya ne iyakaisi eni oya.”

¹⁷ God me desirom desirom gumbo kepte mumpu. Ye wayana me Maman. Meoya gare mame piyuwau waketu kumiwa apa me gumbe a gaibu wakeigimiya. ¹⁸ Ye yaug anoyana, nu wakewake numa kukaeba me isimuranaiwa gumbo onnewa gumbe sira gwiruwad yenne. God mame ane. Me siruva ge gooru mu matai kukai mutpewa me mina gumbe onan. ¹⁹ Keriso me mae sip usiwa mina. Me siren ge miyot onan. Keriso diyawa oraiwa gumbe ane. ²⁰ Keriso wait namu wat gomiyane, ivi piyu mame wadne. Sira mame kum oieba apa me yenan oya uwane. ²¹ God ane Keriso boriruwaya igiyawa gumbo sira inaine, eyawa wanne. Ye Keriso gumbe God me anotumat ene igiyawa. Mame mina, anotumat yeumawa ge ano imug yeumawa me God gumbe.

²² Ye natawa gumbe atene, sira guwewa muiniyana, sira baigan yeuma tateaiwa gumbo, me ugauga onan. Meoya baigan yeuma noneyap garagara aya. ²³ Ye sira yaiyana. Yawa me matai putaipewa me gumbe onan, megara yawa me den putaipewa gumbe sira yaiyana. Me God gaiyawa me wakeigimpewa ge matai den tobiyapewa. ²⁴ Kuyiwaya, “Iyayapan undag mu wayo mina. Eyawa mumawa me ben uba mina. Wayo butuig aigivi sira uba aigivi.

^s 1:10 Mat 13:16-17 ^h 1:11 Sam 22; Ais 53; Ruk 24:26-27 ⁱ 1:14 Rom 12:2; Epe 2:3; 4:17-18 ^j 1:16 Rvt 11:44-45; Mat 5:48 ^k 1:17 Rom 2:11; Rev 2:23 ^l 1:19 Apa 20:28; Ibr 9:12-14 ^m 1:20 Epe 1:4; 2Ti 1:9-10 ⁿ 1:21 Jon 14:6; Rom 5:1-2 ^o 1:22 Jon 13:34; Rom 12:10 ^p 1:24-25 Ais 40:6-8

²⁵ Megara God gaiyawa me den tobiyape yaibobot tunano.”
Mame me Gae oraiwa gaiyawa me ye wag diruiyennewa.

2 ¹ Meoya ye anoano kukaeba undag, ugauga undag, taibewa
oraimina megara danawewa kukainewa, yaug anogugut, iyayapan
upeba gumbo gae kukaeba watanwa undag yankweya. ² Kikiyan matai
yaieme mina, ye gae amawa sinsin anoigimiya, ye yoig waita autan oya.
³ Ye wait ag yauyana Ayapan me anoano oraivitwa.

An Wakeiviwa Ge Iyayapan God Wat Gomiyamunnewa

⁴ Ayapan gumbe oneya. Iyayapan mu Ayapan epa aoreya, megara God
yangave me an wat gomiyanewa sira garawa kokavitwa sira wakeiviwa.
⁵ Ye gaibu an wakeiviwa mina, guwawa gweyawa guniyap sipe. Meve
pirisi iyakaisi mina Keriso gumbe guwawa puyowawa me God degadega
gumbe autanwa waniya. ⁶ Kuyawa Baiboru maib waivi.

“Yauya. Ne Saion apa an niu barautna.

Me wat gomiyanawa sira garawa kokavitwa.

Iyayapan mu me gumbe anotumat apewa matai danadawai den aupe.”

⁷ Meoya ye bira da anotumat aiviwa oya me garawa kokavitwa.

Megara bira da anotumat den aiviwa gumbo,

“An me gwe sisi igiyawa topayayawa

me an natawa oraivitwa me visidonawa apa teyawa ane.”

⁸ Sira,

“An me gumbe iyayapan tog uyug aigtan emewa.

Sira me an koka me ebu tobodnewa.”

Mu uyug aigeme, kuiyawa mu God gaiyawa gumbe den amome. Mu meib
gomiya munne.

⁹ Megara ye wait gomiyayenne igiyawa, kin pirisi igiyawa, iyakaisi
igiyawa, God iyayapan meuma. God yenan wane ye sisip dana dauwag
me eyawa meuma oraiwa gumbe. Meoya ye oraiwa meuma taibe watanit
di. ¹⁰ Ye watawit God iyayapan meuma onan, megara gare ye God
iyayapan meuma. Watawit God yenan den ano yemne, megara gare wait
di yenan anoivi.

¹¹ Iyayapan neuma, yenan anoeni. Ye amdau ampa aisiyana igiyawa
sira aiseg wakeyana igiyawa. Meoya ye uinantaraki anoanowawa me ye
guwewa gumbe anavi aiviwa epa aoreya. ¹² Ye inaiinai oraiwa gumbe
wakeya Ju onan igiyawa gumbo. Ye meib di aya. Ye diruig kukaeba
gumbe waigimpe, megara mu wakewake yeuma oraiwa yaupe, ivi me
uwanumpewa kumiwa apa God gumbe waiya ape.

⁹ 2:1 Epe 4:22; Jms 1:21 ¹ 2:3 Sam 34:8 ² 2:5 Epe 2:21-22; Rev 1:6 ³ 2:6 Ais 28:16;
Epe 2:20 ⁴ 2:7 Sam 118:22 ⁵ 2:8 Ais 8:14 ⁶ 2:9 Deu 7:6; 14:2; Ais 9:2; Apa 26:18;
Epe 5:8 ⁷ 2:10 Ose 2:23 ⁸ 2:11 Gar 5:17,24 ⁹ 2:12 Mat 5:16

Namuyoiyoi Igiyawa Nouwa Autanwa

¹³ ^aYusiwa mu iyayapan wak barauyawa wakeya. Ye mu undag nouwa auya Ayapan oya. Kin painauvitwa gumbe meib aya, ¹⁴ sira amareme igiyawa me kin tene onamiyawa mu kukaeba eme igiyawa gumbe pui yutan oya, oraiwa eme igiyawa waiya atan oya onamiyawa mu gumbo meib aya. ¹⁵ ^bOraiwa aya, sira kuiyowa onan igiyawa mu gae ui onan vemewa ye aya nouwa iyadmutpe. Me God ano meumawa. ¹⁶ Ui onan wakeviwa mina ye yaimoyai wakeg aigimiya. Ye ano yeuma gumbe God ankwatave nau eme igiyawa mina aigimiya. Megara ano yeuma gumbe kukaeba da den aya. ¹⁷ ^cYe iyayapan undag ayamat muniya. Tateaiwa baigan muniya, God gumbe a aya, sira kin gumbe ayamat aya.

¹⁸ ^dKoukawa nau muma eme igiyawa. Kokawa yeuma noiwa noneyap auya. Kokawa yeuma oraimina ge yaimoyai aiviwa gumbe noiwa auya, sira kokawa yeuma me yaimoyai den aiviwa me mina gaibu meib desirom aug aigimiya. ¹⁹ Apan da gwambe den ane megara danadawai aune, megara God namive apan mame nonemagawa oraiwa gumbe danadawai aug uiwa nikiaviwa, me gumbe God degadega ape. ²⁰ ^eYe kukaeba ayanawa, matai ye guraipe. Ye uiwa nikiyaigimiyawa, me oraiwa yeuma onan. Ye oraiwa ag danadawai avigimiyawa, sira ye uiwa nikiyaigimiyawa, God degadega ape. ²¹ ^fMe oya God yenan auwane. Kuiyawa Keriso yenan edawai aune. Me ebu oraiwa toewan yenne, meoya ye ineyawa em aisiya.

²² ^g“Keriso kukaeba da den ane, uga da den wane.”

²³ ^hIyayapan gae kukaeba me gumbe waya, megara me garawa kukaeba den wane. Iyayapan me gumbe edawai waniya, megara mu anog a atanwa oya den dirum wane. God me membovit oma ane oraivit keptete ape, meoya Keriso me membovit aug Mamunwa God namive baraune.

²⁴ ⁱKorosi egave kukaeba numa me mekut aune. Natawa me kukaeba numa gumbe boag anoano oraivitwa gumbe wakeigimta. Keriso toyawa sirenawa gumbe ye inaigisiyana. ²⁵ ^jYe mae sip mina pimpangitene, megara gare ye Apan me guwewa amaraiviwa abnawa ge namuyoiyoi abnawa wakenewa gumbe sira taig oniyana.

Biyutuwa Ge Memotuwa

3 ¹ ^kEbu desiroma, biyutuwa, ye memetuiwa nouwa auya. Memetuiwa gae anotan den apewa go, megara nouwa auya, kuiyawa vesin wakewake muma gae gaibu onanwa gumbe mu God igiyawa matai

^a 2:13 Tai 3:1 ^b 2:15 1Pi 3:16 ^c 2:17 Rom 12:10 ^d 2:18 Epe 6:5 ^e 2:20 1Pi 3:14,17
^f 2:21 Mat 16:24; Jon 13:15 ^g 2:22 Ais 53:9 ^h 2:23 Ais 53:7; 1Pi 3:9 ⁱ 2:24 Ais 53:5-6; Rom 6:11 ^j 2:25 Ejk 34:5-6; Mat 9:36; Jon 10:14; Ibr 13:20-21 ^k 3:1 Epe 5:22

ape. ²Kuiyawa ye God gumbe a ag iyakaisi ag wakeigimiyawa, meve memetuiwa ye wakewake yeuma iyakaisi yemigimpe. ³¹Ye kuiye gumewa yakot ene, gooru gumbe ben warene, sira wape oraiwa gaibu warene. Dividivi mame mu taibewa benawa. ⁴Megara ye daneyaba benawa gaibu ben wariya. Ye guwewa me mokonairenwaga ge yaimoyai wakeiviwa auya. Me den putaipe. Me mina, inaiinai yeuma guwavewa gumbe ben wariya. Dividivi mame me garawa kokavit God namive. ⁵Watavit vesin iyakaisi mu God gumbe anoemewa wakeya, sira vesin mame me mina mumbovit ben wariya, sira memotuwa nouwa auya. ⁶^mGuwaguwawa me mamaib. Seira me Ebraam auwanewa me apan koka meumawa, sira noiwa aune. Ye gaibu dividivi undag a den aya, sira oraiwa ayawa, ye Seira gwaitawaiwa aya.

⁷ⁿEbu desiroma, memetuiwa, ye yaug anoya bivituiwa mu vesin sira ye yutuipama megara mu yutuwa onan. Meve mu gaibu yayai wakeigimiyawa. Sira mu gumbo ayamat aigimiyawa, kuiyawa mu ano oraiwa gumbe ye gaibu inaiinai aupe. Meve nun yeuma divi da den wataipe.

Oraiwa Atanwa

⁸Ne oieba watna. Ye imuiwa desirom ape, gara wad memeyam aya, tateaiwa gumbo baigan aigimiyawa, mu gumbo danadawai aug, mokona aya. ⁹Bira da kukaeba guniyap apewa garawa gumbo kukaeba den aya, sira bira da yan yau yempewa ye mu yan den yawamiya. Megara waribiya muniya. God yenan auwane waribiya yentan oya. ¹⁰^oKuiyawa “Bira da membovit inaiinai meuma baigan niyape sira kum meuma oraiwa autan anoiviwa, me pednawa di amarape, gae kukaeba den di wape. Sira noiwa tobotpe, ugauga den di wape. ¹¹Me kukaeba gumbe di aipe, oraiwa di ape. Yum oya yobag, amave aipe. ¹²Ayapan yangawa me iyayapan siwavitwa gumbo, sira Ayapan naunawa mu nun mumawa gumbo. Megara Ayapan ginanamiwa me kukaeba igiyawa gumbo namiwa pipau tope.”

¹³Ye kum evedni oraivit aigimiyawa, bira ye watkukamyempe. Bira da onan. ¹⁴^pYe oraiwa oya danadawai avigimiyawa, me oraiwa. Mu gurepewa oya den a aya, danadawai den auya. ¹⁵Megara nonemageyap Keriso waiya aigimiyawa, me Ayapan. Anoenewa me nonemageyap wakenewa oya bira da yenan singui yempe, meoya ye di tamibarip aya natawa wag toewan muntan oya. ¹⁶^qMegara nonemageyap oraiwa esinewa gumbe gara wag toewan muniya. Iyayapan mu diruig

¹ 3:3 1Ti 2:9 ^m 3:6 Gen 18:12 ⁿ 3:7 Epe 5:25 ^o 3:10-12 Sam 34:12-16
^p 3:14 Ais 8:12-13; Mat 5:10; 1Pi 2:20; 4:14 ^q 3:16 1Pi 2:12

waigimpewa mu ye inainai yeuma oraiwa Keriso gumbe ene oya. Mu matai ubmam warampe kuiyawa ye diruyeg veme oya. ¹⁷God ano meuma wakenewa, danadawai avigimiya oraiwa yeuma ene oya me baina, megara danadawai avigimiya kukaeba yeuma ene oya me baina onan. ¹⁸Keriso boane kukaeba oya kum desirom mekut. Apan oraiwa boane iyayapan kukaeba munan. Me kwapiwa gumbe barauya boane, megara guwawa gumbe sira inaine. Me ye tam God namive teyenne. ¹⁹Guwawa gumbe, Keriso me guwowa mu tamiyawa gumbo aig opata wag dirumne, sira guwowa anoya. ²⁰Watavit Noa kumiwa apa Noa wa koka siiviwa, God yaiyai iyayapan munan amaraivi, megara mu God noiwa den auya. Guwowa tamiyawa me meib. Iyayapan 8 mukut wa koka danave yoi gumbe waita auya. ²¹Yoi mame babataito guwaguwawa. Babataito me gare ye waita yenivi. Babataito me—kwapiwa miyotawa den muintan onan, megara me nonemagewa oraiwa God gumbe agi atanwa,—sira me lesu Keriso sira inaig yoinewa oya. ²²Keriso kwimin dog aine, sira God naniyutanwa apa wakene. Keriso ankwatave aneya wakeya, sira me yusipamitwa me nauwawa gumbe oniviwa ge yusiwa gaibu wakene.

4 ¹Mame mina, Keriso kwapiwa gumbe edawai aune, meoya ye mina meib beyan yeuma tamiya. Apan da me kwapiwa gumbe edawai aunewa kukaeba yankwene. ²Sira piyu mame apa wakewake meuma kumiwa apa, me apan ano kukaeba oya onan megara God ano meuma oya yaiyai waketanit di. ³Ye dividivi undag me Ju onan igiyawa atan anoemewa ayana. Guwaguwawa me mamaib, uinantaraki, vesin oya anoemewa, yoi yaigipama nemewa, pipamu temewa, buyunai egave degadega emewa, god ugaugaeba waiya emewa meiba. Watavit meib ag ongenewa, me minambe. ⁴Ye mu gaibu kukaeba den ene, meoya mu anog pipamu teme, meoya mu ye guniyap anokukam eme. ⁵God me mekut wakeyawa ge boriruwawaya matai keptete mumpe. Mu mukut God gumbe wakewake mumawa oya yaiyai watanit di. ⁶Kuiyawa gae oraiwa opata boriruwaya igiyawa me mina gumbo wag dirumne. Natawa me iyayapan mu kwapuwa gumbe kepte mumpe, megara guwowa gambenwa God gumbe wakepe.

⁷Dividivi undag oieba oya koni aivi. Meoya nun oya imuiwa esipe sira amaraigimiya. ⁸Namuirenwa baigan kokavit garawan aya. Kuiyawa baigan me kukaeba obiren umpe. ⁹Gara di diguragut den aya, baigan aigimiya. ¹⁰Ye desirom desirom guniyap God puyo yenne, meoya God puyo meuma amareme igiyawa oraiwa aya. Sira puyo meuma gumbe gara waita aya. ¹¹Apan da gae watan apewa, me kweya God gaiyawa desiroma wape. Apan da God oya nau atan apewa, me kweya nau atanit

^r 3:20 Gen 6:1-7:22 ^s 4:1 Rom 6:2,7 ^t 4:3 Epe 2:2-3 ^u 4:5 Apa 10:42

^v 4:7 Rom 13:11-12 ^w 4:8 1Pi 1:22 ^x 4:9 1br 13:2 ^y 4:10-11 Rom 12:6-8

di yusiwa God wannewa gumbe. Me dividivi undag gumbo Iesu Keriso gumbe God waiya waiya aigimtan oya. Keriso gumbe eyawa ge yusipama wakeg aigimpe viripusi onan. Amen.

Kristian Danadawaeba

¹²Iyayapan neuma. Amaerot me iyam minawa ag yauyemivi, danadawai kokavit auene. Megara den anoya dividivi gina ubeube wait uwayemne. ¹³Megara degadega auya, kuiyawa Keriso edawai meuma gaibu undag auene. Keriso uwapewa kumiwa apa degadega yeuma kokavit ape. ¹⁴Keriso iviwa gumbe diruig wat kukayemigimpewa, ye me degadega aigimiya. Kuiyawa Eyawa Guwawa me God Guwawa me guniyap wakeigimpe. ¹⁵Ye yapeyap, da tope boipe abnawa, ub abnawa, kukaeba aivi abnawa, iyayapan aya munivi abnawa me mina den aya. Kuiyawa me oya, iyayapan ye diruig meib waigimpewa me oraimina onan. ¹⁶Megara ye Kristian ayana oya danadawai avigimiyawa, me ubmam den aya. Megara ivuiwa mame gumbe God waiya aya, kuiyawa ye me Keriso iviwa auyana. ¹⁷Kuiyawa keptete kumiwa koni aivi. Me God iyayapan meuma gumbo amatope. Keptete namu nu gunup amatope ipewa, iyayapan mu God gae oraiwa gumbe anotumat den emewa gumbo keptete aninin ape?

¹⁸^bSira, iyayapan oraiwa igiyawa aninin waita aupe ipewa, God anotumat den eme igiyawa sira kukaeba igiyawa mu gumbo aninin ape?

¹⁹Meoya iyayapan mu God ano meuma gumbe edawai auemewa, mu sira oraiwa ape mumbovit wad munnewa me natawa abnawa gumbe guwewa baraug anotumat ape.

Siosi Amareme Igiyawa Ge Ud Mataiwa

5 ¹Siosi namuyoiyoi igiyawa guniyap wakeyawa mu gumbo ne anoeniwa dividivi undag mame ye matai aya. Ne mina gaibu siosi namuyoiyoi abnawa, ge Keriso edawai meuma yaug anonawa abnawa, sira eyawa me matai uwapewa gaibu autan eni abnawa. ²God mae sip meuma guniyap wakeyawa amat amunigimiya. Ye yaiyai aya danapiripam onan. Garawa anmagawa autanwa oya onan, nonemageyap nau aya. ³God anotumat yennewa gumbe ye apan kokawa den aya. Ye gwe gwe yeuma sip meuma gumbo guwaguwawa aya. ⁴Mae sip amaraivi abnawa kokavitwa uwapewa, ye eyawa keret meuma me den kukaiviwa me auya.

⁵Ebu desiroma mina, ud mataiwa, ye namuyoiyoi igiyawa nouwa auya. Mokona garagara aya. Kuiyawa

^z 4:13 Apa 5:41; Jms 1:2; 1Pi 1:6-7 ^a 4:14 1Pi 2:20 ^b 4:18 Pro 11:31 ^c 5:2 Jon 21:15-17; Apa 20:28 ^d 5:3 2Ko 1:24; Pir 3:17; Tai 2:7 ^e 5:5 Pro 3:34; Epe 5:21; Jms 4:6

“God apanapan eme igiyawa topai munivi,
sira ano oraiwa mokona igiyawa munivi.”

^{6f}Meoya God naniwa yusipama ankwatave mokona aya. Kuyawa God me kum oraiwa gumbe ye matai owan auyempe. ^{7g}Ye danadawai yeuma undag God gumbe baraug yankweya. Kuyawa God ye amat ayenigimpe.

^{8h}Yaiyai wakeg amaraigimiya. Seitan me anavi yeuma. Me mae raion me ug tog waiwiwa mina mae natan oya yobag gigivi. ⁹ⁱAnotumat gumbe yusipamit owan yoig Seitan topayaya. Ye yaug anoyana, iyayapan mu tateaiwa piyu mame danave wakeyawa mu danadawai demtawa desiroma auya.

¹⁰God gumbe ano oraiwa undag noidauwane. Me God me Keriso gumbe eyawa yaibobot danave yenan auwanewa. Ye danadawai auene, megara kum koniwa onanapeve God aiyempe oraminavit aya, aiyempe yusipamit owan yoiya, aiyempe yutuiwa wape, sira aiyempe siwavit yokeigimiya. ¹¹God gumbe yusiwa meib di wakeigimpe evedni viripusi onan. Amen.

Gaun Oieba

^{12j}Ne yaug anona Sairas^k me anotumat oraiwa abnawa. Me waita meuma gumbe, ne taibe gigirum tena, ye yutuiwa wag diruiyentan oya sira mame me God ano oraiwa meuma natawa wag toyau yemtan oya. Ano oraiwa mame danave owan siwavit yoiya. ^{13l}Vesin da guniyap wat gomianewa me Babiron apa wakenewa me gaun meuma guniyap waivi. Sira utunwa Mak gaibu gaun waivi. ¹⁴Ye baigan uwatotoaeba gumbe gaun garawan aya. Ye undag Keriso gumbe wakeenewa, yum guniyap wakeigimpe.

^f 5:6 Mat 23:12; Ruk 14:11; Jms 4:10 ^g 5:7 Mat 6:25-30 ^h 5:8 1Te 5:6 ⁱ 5:9 Epe 6:11-13; Jms 4:7 ^j 5:12 Apa 12:2,25; 13:13; 15:22,37-40 ^k 5:12 Namu teyawa danave desirom waiwiwa me iwiwa Siruwanus. ^l 5:13 Apa 12:2; 2Ti 4:11